

CONVENIO DE COLABORACIÓN ENTRE A CONSELLERÍA DE EDUCACIÓN, UNIVERSIDADE E FORMACIÓN PROFESIONAL E A UNIVERSIDADE DA CORUÑA(UDC) PARA O DESENVOLVEMENTO DE ACCIÓNS ESTRATÉXICAS DE I+D+i 2019-2020

Santiago de Compostela, 15 de xullo de 2019

COMPARECEN

(...), conselleira de Educación, Universidade e Formación Profesional, nomeada mediante o Decreto 96/2018, do 26 de setembro (DOG núm. 185 do 27 de setembro), de acordo co disposto no artigo 34 da Lei 1/1983, do 22 de febreiro, de normas reguladoras da Xunta e da súa Presidencia e no acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares, publicado pola Resolución da Consellería de Economía e Facenda do 8 de abril de 1991 (DOG núm. 82, do 30 de abril).

(...), reitor magnífico da Universidade da Coruña (en adiante UDC), en representación desta, en virtude das facultades que lle confire o artigo 20.1 da Lei orgánica 6/2001, do 21 de decembro, de universidades.

Interveñen en función dos seus respectivos cargos e no exercicio das facultades que teñen conferidas e

EXPOÑEN

PRIMEIRO.- As universidades que integran o Sistema Universitario de Galicia (en adiante SUG) son entidades que forman parte do sector público institucional que, realizan actividades de investigación e desenvolvemento científico e tecnolóxico o que as configura como un dos principais axentes xeradores de coñecemento en Galicia.

En Galicia, a universidade pública é o lugar onde máis se investiga. O impulso da actividade investigadora é un obxectivo irrenunciable para calquera sociedade e por iso é necesario fomentar unha maior integración entre os centros de investigación e os sectores produtivos, incidir na cultura da calidade e eficacia na utilización das infraestruturas e do capital humano que permitan unha mellora significativa na totalidade dos sectores produtivos e, a súa vez, a potenciación dunha universidade galega de calidade.

SEGUNDO.- A Secretaría Xeral de Universidades é o órgano superior da Administración xeral da Comunidade Autónoma de Galicia para a ordenación, planificación e execución das competencias en materia de universidades e ensinanzas universitarias correspondentes á Consellería de Educación, Universidade e Formación Profesional en relación coas atribuídas polo artigo 31 do Estatuto de Autonomía de Galicia. A Secretaría Xeral de Universidades, de acordo coas competencias que lle outorgou o Decreto 138/2018, do 8 de novembro, de estrutura orgánica da Consellería, debe velar pola promoción e xestión eficiente e integradora dos recursos e capacidades de investigación do SUG para a súa posta en valor no marco do sistema de innovación e, particularmente, a promoción da coordinación das universidades galegas no establecemento de programas, infraestruturas e actuacións en materia de investigación.

TERCEIRO.- Na actualidade a investigación configúrase como fundamento da docencia e como medio para o desenvolvemento científico e cultural da sociedade, a través da transferencia de coñecemento. O sistema público de I+D en Galicia, no ámbito universitario, ven amosando unha mellora da capacidade investigadora e dos seus resultados tanto pola adecuada estruturación dos recursos e da actividade de investigación coma pola mellora da súa calidade.

Para garantir a produción dunha investigación de calidade por parte do sistema galego de I+D+i é esencial contar con estratexias e estruturas eficaces que xeren unha contorna favorable á investigación e fortalezan un sistema integral que garanta a excelencia científica.

Compre, polo tanto, contar cun conxunto de medidas e accións concretas a desenvolver por actores específicos para mellorar as infraestruturas, intensificar a actividade investigadora e aumentar a produtividade científica mediante a diversificación na chegada de recursos.

CUARTO.- Con cargo aos orzamentos de investigación da Consellería, cada ano iníciáanse accións encamiñadas a financiar a investigación universitaria, xa sexa mediante convocatorias de concorrencia competitiva ou convenios de colaboración.

En consecuencia, a Consellería vén negociando coas Universidades do SUG, a sinatura de convenios de colaboración, co fin de apoiar as súas estratexias de investigación. Estes convenios establécense en función das necesidades e peculiaridades específicas de cada unha delas, podendo ter carácter anual ou plurianual, dependendo das propias características das actividades financiadas ou das necesidades conxunturais de cada universidade.

Polo tanto, as actuacións en I+D+i que se recollen nos distintos convenios responden a finalidades concretas e diferenciadas, aínda que algunhas destas accións poidan dar continuidade a outras xa iniciadas con anterioridade.

QUINTO.- Que H2020 é a estratexia de especialización da Unión Europea para facer fronte á crise e acadar unha economía intelixente, sustentable e integradora que goce de altos niveis de emprego, de produtividade e de cohesión social. Nesta estratexia destácase o papel fundamental da investigación e da innovación na preparación da Unión Europea ante os desafíos futuros e sinala cinco ambiciosos obxectivos en materia de emprego, innovación, educación, integración social e clima/enerxía.

A estratexia Europa 2020 considera que o apoio á investigación e á innovación terá que desenvolverse ao redor da excelencia científica, as industrias competitivas e unha mellor sociedade, centrando o investimento nos principais problemas comúns de todos os europeos, como o cambio climático e a competitividade da enerxía renovable ou os desafíos dunha poboación cada vez máis envellecida.

SEXTO.- Estímase que as actuacións previstas no presente convenio son coherentes co Plan estratéxico de Galicia 2015-2020, correspondéndose co seu Eixo EI (“Empregabilidade e crecemento intelixente”), Prioridade de actuación PA01 (“Impulso de consolidación das políticas de gasto vencelladas ao I+D+i”), no obxectivo estratéxico OE02 (“Mellorar a capacidade investigadora e os resultados da investigación universitaria galega”).

SÉTIMO.- Que para garantir a produción dunha investigación de calidade por parte do sistema galego de I+D+i é esencial contar con estratexias e estruturas eficaces que xeren unha contorna favorable á investigación e fortalezan un sistema integral que garanta a excelencia científica, para elo a Universidade da Coruña presenta unha proposta para desenvolver accións de mellora en diferentes aspectos e a partir da situación actual a Consellería considera necesario impulsar accións de ordenación, estruturación e potenciación da investigación.

Por conseguinte, as partes abaixo asinantes acordan subscribir o presente convenio, que se rexerá polas seguintes

CLÁUSULAS

PRIMEIRA.- Obxecto do convenio

O obxecto deste convenio é establecer as condicións polas que se rexerá a colaboración entre a consellería e a UDC para o desenvolvemento de actuacións estratéxicas de I+D+i co fin de mellorar as infraestruturas, intensificar a actividade investigadora e aumentar a produtividade científica mediante a diversificación na chegada de recursos.

O orzamento será de 3.238.609,00 €, distribuídos nas anualidades 2019 e 2020, coas actuacións que se resumen no seguinte cadro:

ACTUACIÓNS			
Conceptos	2019	2020	Total
1. Edificios, instalacións e equipamentos	530.000,00	250.000,00	780.000,00
2. Renovación tecnolóxica	285.000,00	240.000,00	525.000,00
3. Posicionamento e internacionalización das estruturas de investigación	107.000,00	60.000,00	167.000,00
4. Internacionalización e posta en valor liñas de especialización no ámbito da innovación e sustentabilidade e recursos docentes	160.000,00	150.000,00	310.000,00
5. Reforzo do programa de Centros de Investigación	49.320,00	73.980,00	123.300,00
6. Formación dunha agrupación de investigación no ámbito da industria intelixente	110.000,00		110.000,00
7. Equipamento especializado para a fabricación aditiva e a industria intelixente	65.000,00	335.000,00	400.000,00
8. Recursos docentes e actividade académica	70.000,00		70.000,00
9. Equipamento científico-tecnolóxico FEDER	307.632,00	285.677,00	593.309,00
10. Recursos bibliográficos	36.000,00		36.000,00
11. Congresos nacionais e internacionais, feiras internacionais e promoción/dinamización da lingua galega	47.000,00	27.000,00	74.000,00
12. Apoio ITMATI (Instituto Matemática Industrial)	50.000,00		50.000,00
TOTAL	1.816.952,00	1.421.657,00	3.238.609,00

SEGUNDA.- Actuacións

1. Edificios, instalacións e equipamentos

Trátase da rehabilitación e acondicionamento para a mellora de climatización e ventilación, así como reforma, ampliación e mellora nos interiores de varios edificios. Tamén se levarán a cabo proxectos de mellora de eficiencia enerxética e mellora nas instalacións e equipamentos e mobiliario para diferentes centros. Estas actuacións levaranse a cabo nas anualidades 2019 e 2020, e, entre as mesmas están:

A) Edificios e outras construcións.-

- Campus de Elviña e da Zapateira: sinalética;
- Facultade de Ciencias da Comunicación: mellora no plató de audiovisuais;
- Facultade de Ciencias da Educación: tabique móbil para separación de aulas, mobiliario e renovación do control da sala de caldeiras e climatización;
- Facultade de Informática: acondicionamento de instalacións;
- Reitoría: proxecto de refrixeración e calefacción (1ª fase);
- Escola Técnica de Arquitectura (ETSAC): novos ventanais e iluminación, proxecto para acondicionamento do edificio mixto de investigación da madeira;
- Escola de Náutica e Máquinas e edificio de Oza: proxectos de illamento térmico para envolventes;
- Ciencias da Comunicación e Socioloxía: proxecto de rehabilitación interior do edificio.

B) Instalacións e equipamentos.-

- Centro de Innovación Tecnolóxica en Edificación e Enxeñería Civil (CITEEC): mobiliario e equipamento especializado para os Laboratorios de Mecánica de Rochas, Ferrocarrís, Instrumentación e Sistemas Intelixentes, Enxeñería Sanitaria e Ambiental e a oficina técnica, Hidráulica, Portos e Costas e Túnel de Vento;
- Centro de Investigacións Científicas Avanzadas (CICA): finalización accións novos laboratorios do andar 1, Laboratorio de Proteómica, cromatografía de gases, depósito para nitróxeno, Caseta de produtos químicos e almacenaxe de disolventes e Bomba de calor;
- Laboratorios de Ciencias e enfriadora para a Facultade de Informática;
- Edificio de servizos de apoio á investigación (LERD) e do Edificio de Área Científica: mobiliario e acondicionamento de locais;
- Facultade de Filoloxía e Informática: mobiliario e equipamento;

Esta achega distribuirase

Conceptos	2019	2020	Total
1. Edificios, instalacións e equipamentos	530.000,00	250.000,00	780.000,00

2. Renovación tecnolóxica

Nas anualidades 2019 e 2020 realizaranse accións dirixidas á renovación ou mellora de software, entre outras, na escola de Náutica e Máquinas (simuladores); no Laboratorio de videoxogos (animación, sonorización, software especializado, equipamento realidade virtual); no Centro de Investigacións Tecnolóxicas (combustibles); na Facultade de Ciencias (laboratorios investigación de nanociencia); na Facultade de Filoloxía (laboratorio de análise de datos e lingüística); e no CICA (licencias de software para grupos de investigación).

Esta achega distribuirase

Conceptos	2019	2020	Total
2. Renovación tecnolóxica	285.000,00	240.000,00	525.000,00

3. Posicionamento e internacionalización das principais unidades de investigación

Nesta actuación levaranse a cabo actuacións encamiñadas á posta en valor dos centros de investigación singulares, así como o apoio as accións de transferencia e de internacionalización dos centros de investigación.

As accións previstas, que abarcarán as anualidades 2019 e 2020 son as seguintes:

- **CITIC** (Centro de Investigación en Tecnoloxías da Información e as Comunicacions): Programa de mellora da visibilidade internacional e na rede de relacións internacionais; Organización de reunións e posta en valor das capacidades de I+D+I: Universidade de Beijing, Machine learning; Xove Tic asociado a Eurasic; Proxectos de I+D+i de base colaborativa.
- **CICA** (Centro de Investigacións Científicas Avanzadas): Proxecto Incrústate.

Esta achega distribuirase

Conceptos	2019	2020	Total
3. Posicionamento e internacionalización das estruturas de investigación	107.000,00	60.000,00	167.000,00

4. Internacionalización e posta en valor das liñas de especialización no ámbito da innovación e sustentabilidade de recursos docentes

Esta actuación consiste en deseñar e implantar programas que permitan dar a coñecer os novos graos, a actividade investigadora e de transferencia, a través de reunións de grupos de investigación, organización de xornadas de portas abertas e todas as actividades conducidas a poñer en valor a oferta docente, investigadora e de internacionalización no ámbito da innovación e da sustentabilidade. As actividades programadas abarcarán as anualidades 2019 e 2020 e estarán orientadas a:

- Internacionalización e posta en valor da actividade investigadora ou de transferencia na área da innovación: Congreso Techling; Difusión oferta formativa; Seminarios dos grupos de traballo asociados ás áreas de especialización; Participación en proxectos de aceleración da innovación; Curso de verán “O humanista dixital”; Xornadas para atraer presenza en estudos do ámbito TIC; Participación no salón educativo de Galicia EDUGAL...
- Internacionalización e posta en valor da actividade investigadora ou de transferencia na área da sustentabilidade: Organización do Symposium Internacional “*Accelerating the Implementation of Sustainable Development in Campus Activities and Programmes*” A Coruña (2-3 decembro 2019); Difusión oferta formativa: elaboración de vídeos promocionais, congresos, seminarios; Seminarios dos grupos de traballo asociados ás áreas de especialización; Programa de aceleración da transferencia a través do mentoring; Formación de laboratorios de innovación a nas áreas de especialización do Campus.
- Recursos docentes: profesorado especializado no ámbito da ciberseguridade e en videoxogos.

Esta achega distribuirase

Conceptos	2019	2020	Total
4. Internacionalización e posta en valor liñas de especialización no ámbito da innovación e sustentabilidade e recursos docentes	160.000,00	150.000,00	310.000,00

5. Reforzo do programa de Centros de investigación

Esta acción ten como finalidade complementar o financiamento daqueles centros acreditados beneficiarios da convocatoria 2016-2019 das *Axudas para acreditación, estruturación e mellora de centros de investigación singulares e agrupacións estratéxicas consolidadas do Sistema Universitario de Galicia* (DOG núm 164, do 31 de agosto de

2016) co obxectivo de evitar períodos sen financiamento dos custos de persoal entre o remate desta convocatoria e o comezo da nova, en fase de tramitación.

Na Universidade da Coruña, o custo estimado dos gastos no centro de investigación beneficiario (CITIC) é :

Conceptos	2019	2020	Total
5. Reforzo do programa de Centros de Investigación	49.320,00	73.980,00	123.300,00

6. Formación dunha agrupación de investigación no ámbito da industria intelixente

A finalidade desta actuación é potenciar a investigación no ámbito da industria intelixente, propoñendo as seguintes accións, que se desenvolverán na anualidade 2019:

- Eixo de posicionamento e visibilidade: desenvolvemento dun plan de comunicación da agrupación, xornadas de portas abertas, eventos culturais e científicos. Inclúese nesta acción o programa de divulgación científica presentada a FECYT (Fundación Española para la Ciencia y la Tecnología) neste ano 2019.
- Eixo de transferencia e cooperación industrial: organización de eventos específicos de transferencia e intercambio de coñecemento agrupación industria intelixente – empresa para dar a coñecer os resultados de I+D+i da agrupación na contorna industrial (workshops, demostracións tecnolóxicas, accións de formación, eventos científicos e tecnolóxicos).
- Eixo de protección científica internacional: programas de formación a través de estancias en centros de referencia, estancias de investigadores visitantes, deseño dun programa de doutoramento en industria intelixente en colaboración coa industria e con docentes internacionais.

Esta achega distribuirase

Conceptos	2019	2020	Total
6. Formación dunha agrupación de investigación no ámbito da industria intelixente	110.000,00		110.000,00

7. Equipamento especializado para a fabricación aditiva e a industria intelixente

Esta acción da resposta ás necesidades que supón a posta en marcha dos novos títulos académicos de dotación de equipamento científico tecnolóxico coa finalidade última de potenciar a transferencia e investigación do Campus: dotación de equipamento de tecnoloxía aditiva e e equipamento de tecnoloxía substractiva.

Esta achega distribuirase

Conceptos	2019	2020	Total
7. Equipamento especializado para a fabricación aditiva e a industria intelixente	65.000,00	335.000,00	400.000,00

8. Recursos docentes e actividade académica

Esta acción levarase a cabo na anualidade 2019 co obxectivo final de formar e difundir as actividades levadas a cabo.

- Recursos docentes:
 - Mestrado en deseño industrial: seminarios especializados.
 - Grao en xestión industrial da moda: seminarios especializados formativos.
 - Mestrado en videoxogos: seminarios especializados.
- Oferta académica:
 - Organización de xornadas de portas abertas, workshops, seminarios e todas as actividades para poñer en valor a oferta académica.
 - Asistencia do profesorado a feiras para difusión da oferta académica e cursos de formación especializada.

Esta achega distribuirase

Conceptos	2019	2020	Total
8. Recursos docentes e actividade académica	70.000,00		70.000,00

9. Equipamento científico-tecnolóxico FEDER

Esta acción aplícase ao cofinanciamento da achega económica que a UDC necesita para afrontar o custo total dos investimentos subvencionados concedidos nominalmente pola *Resolución da Secretaría de Estado de Universidades, Investigación, Desenvolvemento e Innovación e Presidencia da Axencia Estatal de Investigación pola que se conceden axudas correspondentes á convocatoria de adquisición de equipamento científico-técnico correspondente ao ano 2018, correspondentes ao subprograma estatal de infraestruturas de investigación e equipamento científico-técnico, no marco do Plan Estatal de Investigación Científica e Técnica e de Innovación 2017-2020* (<https://sede.micinn.gob.es>).

A Consellería comprométese a financiar a parte do investimento que debe afrontar cada Universidade en relación ás actuacións subvencionadas segundo o indicado na devandita Resolución, coa seguinte desagregación:

Infraestruturas	Centro	Coste financiable	Axuda FEDER concedida	Cofinanciamento Xunta de Galicia
Equipo movemento cargas pesadas para acceso a laboratorios investigación	CITEEC	305.907,36	244.725,89	61.181,47
Actualización de sistemas de análises de mostras ambientais e biolóxicas	Instituto Universitario de Medio Ambiente	346.527,12	277.221,00	69.306,12
Torre de caída para ensaio de materiais e sistemas de absorción de impacto en infraestruturas e medios de transporte	CITEEC	210.000,00	168.000,00	42.000,00
Equipo óptico medición tenso-deformacional 2D e 3D	CITEEC	140.000,00	112.000,00	28.000,00
Infraestrutura para a optimización de recursos de cómputo orientada a proxectos de análise de datos masivos e securización de sistemas e redes	CITIC	336.637,00	269.309,60	67.327,40
Espectómetro de análise de masas de alta resolución para Proteomlab	CICA	565.946,00	452.756,80	113.189,20
Renovación espectrómetro de masas de relacións isotópicas con acoplamento a analizador elemental	SAI	199.610,00	159.688,00	39.922,00
Renovación espectrometría de masas de baixa resolución acoplada a cromatografía	SAI	605.528,54	484.422,83	121.105,71
TOTAL		2.710.156,02	2.168.124,12	542.031,90

A maiores, achegarse un financiamento complementario no seguinte equipamento:

Equipo óptico medición tenso-deformacional 2D e 3D	CITEEC	51.276,71
--	--------	-----------

Esta achega distribuirase:

2019	2020	TOTAL
307.632,00	285.677,00	(*)593.309,00

(*) Cantidad redondeada a unidades

10. Recursos bibliográficos

Esta achega, prevista para a anualidade 2019, destinarase ao Consorcio de Bibliotecas Universitarias de Galicia para a adquisición de subministro de licenzas de acceso a unha serie de recursos científicos en liña que conforme o núcleo dunha biblioteca electrónica accesible en rede ao conxunto da comunidade universitaria.

Estes recursos constitúen o principal medio de transmisión e validación dos coñecementos científicos e dos resultados de investigación.

Esta achega distribuirase

Conceptos	2019	2020	Total
10. Recursos bibliográficos	36.000,00		36.000,00

11. Congresos nacionais e internacionais, asistencia a feiras internacionais e promoción e dinamización da lingua galega

Esta acción, para 2019 e 2020, está orientada á colaboración na organización de congresos nacionais e internacionais, así como á asistencia a feiras internacionais relacionados coas actividades de investigación que leva a cabo a UDC. Tamén se levarán a cabo actividades de promoción e dinamización da lingua galega.

Esta achega distribuirase

Conceptos	2019	2020	Total
11. Congresos nacionais e internacionais, feiras internacionais e promoción/dinamización da lingua galega	47.000,00	27.000,00	74.000,00

12. Apoio ITMATI

Esta acción levarase a cabo na anualidade 2019 e ten como finalidade o apoio ao Instituto Tecnolóxico de Matemática Industrial (ITMATI) co obxectivo de que, tal e como se recolle nos seus propios estatutos, poida facer unha transición a un Centro de Apoio a Innovación (CAI).

Esta achega distribuirase

Conceptos	2019	2020	Total
12. Apoio ITMATI (Instituto Matemática Industrial)	50.000,00		50.000,00

TERCEIRA.- Financiamento

A dotación da CONSELLERÍA para este convenio é de tres millóns douscentos dezaoto mil seiscientos nove euros (3.238.609,00 €), con cargo ao Plan galego de financiamento universitario 2016-2020 (aprobado polo Acordo do Consello da Xunta de Galicia do 29 de outubro de 2015, DOG número 221, do 19 de novembro), de acordo coa seguinte aplicación orzamentaria: 10.40.561B.744.0 código de proxecto (2016 00129). O reparto deste importe por anualidades é o seguinte:

ANUALIDADES	2019	2020	TOTAL
	1.816.952,00	1.421.657,00	3.238.609,00

Esta cantidade de 3.238.609,00 € trátase dun importe certo e corresponde ao financiamento das actividades recollidas neste convenio, estando ao disposto no artigo 21.2 do regulamento da Lei 9/2007, do 13 de xuño, de subvencións de Galicia, aprobado polo Decreto 11/2009, do 8 de xaneiro.

No caso de existir baixas económicas nas adxudicacións realizadas tamén se poderán incluír aqueles investimentos en equipamento científico-tecnolóxico, infraestruturas de equipamento e mobiliario de laboratorio.

O gasto será elixible nos seguintes conceptos: persoal, equipamento, material funxible, organización e cotas de congresos e seminarios, organización de feiras, actividades de difusión, consultorías e asesoramento externas, ferramentas de xestión do coñecemento e a información, recursos bibliográficos, dietas de viaxe e aloxamento e inversión en instalacións e rehabilitación e acondicionamento de edificios.

A axuda é compatible con outras concedidas para o mesmo fin, pero, en ningún caso, o importe da subvención achegada pola Consellería poderá ser de tal contía que, illada ou en concorrencia con outras subvencións, supere o custo da actividade subvencionada, tal como se establece no artigo 17.3 da Lei 9/2007, do 13 de xuño, de subvencións de Galicia.

De conformidade co artigo 31.7 da Lei 9/2007, do 13 de xuño, de subvencións de Galicia, e de conformidade co establecido no artigo 11.e) do Decreto 11/2009, do 8 de xaneiro, polo que se aproba o regulamento da Lei 9/2007, de subvencións de Galicia, a obriga de presentar a certificación do cumprimento de obrigas coa Administración pública da comunidade autónoma, coa Administración do Estado e coa Seguridade Social substituirase por unha declaración responsable de estar ao día no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda coa Administración.

CUARTA.- Fórmula de pagamento

Para o pagamento, a universidade achegará antes do 15 de decembro de cada anualidade:

- Unha certificación expedida polo órgano de control que corresponda na que se acredite a toma de razón en contabilidade, que se cumpriu a finalidade do presente convenio e que os fondos foron destinados a este fin, así como o detalle da realización dos gastos e dos pagamentos.
- Unha memoria explicativa das actividades desenvolvidas con cargo aos fondos recibidos que, como mínimo, deberá desglosar de forma individualizada cada unha das actuacións descritas neste Convenio (12), cos conceptos, procedementos de contratación, períodos de realización e pagamento dos gastos presentados, así como calquera outra información considerada relevante. En todo caso, a Universidade deberá custodiar e conservar toda a documentación xustificativa derivada dos compromisos deste convenio (facturas ou documentos contables de valor probatorio equivalente, contratos, actas, xustificantes de transferencias bancarias ou calquera outra que sexa necesaria) e poñela a disposición do órgano xestor, ou demais órganos de control, no momento en que esta lle poida ser requirida.
- Unha declaración complementaria do conxunto das axudas solicitadas, tanto as aprobadas ou concedidas como as pendentes de resolución, para este fin, das distintas administracións públicas.
- Así mesmo, deberase presentar unha declaración responsable de estar ao día no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda coa Administración.

QUINTA.- Responsabilidade

A subscrición do presente convenio non supón relación laboral contractual ou de calquera outro tipo entre os/as profesionais que vaian desenvolver as actividades e a Consellería, de tal xeito que non se lle pode exixir ningunha responsabilidade, indirecta nin subsidiaria,

polos actos ou feitos acontecidos no seu desenvolvemento.

SEXTA.- Comisión de seguimento

Para o seguimento do convenio ou coñecemento de calquera cuestión sobre a interpretación, modificación, resolución ou efectos deste que poidan xurdir, créase unha comisión mixta constituída do seguinte modo:

- Tres membros da Secretaría Xeral de Universidades, dos que un actuará como presidente/a.
- Tres membros da Universidade da Coruña.

Esta comisión actuará como órgano de vixilancia, seguimento e control do establecido neste convenio, e promoverá, se o considera conveniente, outras actuacións que poidan enriquecer o seu desenvolvemento.

Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida serán resoltas pola Consellería.

SÉTIMA.- Vixencia do convenio

O presente convenio entrará en vigor coa sinatura dixital do último dos asinantes, sen prexuízo de que poida atender accións realizadas desde o 1 de xaneiro de 2019, e terá vixencia ata o 31 de decembro do 2020.

Non obstante o establecido no apartado anterior, este convenio poderá extinguirse por acordo mutuo e voluntario das partes, por renuncia dalgunha ou por denuncia deste por incumprimento dalgunha delas, o que se comunicará fidedignamente, logo de audiencia desta e con, polo menos, un mes de antelación. En calquera destes casos procederase á revogación da axuda, así coma ao reintegro total ou parcial das cantidades percibidas e a esixencia de xuros de mora nos casos previstos no artigo 33 da Lei 9/2007, do 13 de xuño, de subvencións de Galicia.

OITAVA.- Natureza do convenio

De acordo co establecido no artigo 36 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, este convenio ten un interese público, xa que de conformidade co previsto nos artigos 53 e 54 da Lei 6/2013, do 13 de xuño, do Sistema universitario de Galicia (DOG núm. 125, do 3 de xullo) corresponde á Xunta de Galicia, a través da consellería, coordinar as universidades do SUG para acadar a mellora da docencia, a investigación, a extensión universitaria, a

promoción, a adaptación ás demandas e necesidades da sociedade e a realización de estudos no ámbito da docencia, investigación, innovación, xestión, ...

As actuacións de mellora de I+D+i, estenderanse ás tres universidades galegas, potenciando a racionalización do mapa universitario e concretándose na promoción, deseño e materialización dos instrumentos necesarios para mellorar o financiamento estrutural da súa actividade investigadora.

A tal fin asínanse convenios singulares coas outras universidades adaptados á realidade e necesidades de cada unha delas. Polo tanto, non é necesario promover a concorrência competitiva por tratarse dunha acción coordinada que inclúe a todos os posibles beneficiarios para o mesmo fin.

Este convenio de colaboración ten a natureza dos previstos no artigo 6 da Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, e realízase ao amparo do establecido nos artigos 47 e seguintes da Lei 40/2015 do 1 de outubro, de réxime xurídico do sector público, rexéndose polo establecido nas súas cláusulas e polo establecido na Lei 9/2007, de 13 de xuño, de subvencións de Galicia e no seu Regulamento, aprobado polo Decreto 11/2009, do 8 de xaneiro.

De acordo co disposto na comunicación da comisión sobre o Marco de axudas estatais de investigación e desenvolvemento e innovación (2014/C 198/01), publicado no Diario Oficial da Unión Europea do 27 de xuño de 2014, a subvención contemplada neste convenio non constitúe axuda de Estado nos termos do artigo 107 do Tratado de funcionamento da Unión Europea ao tratarse de financiamento público de actividades non económicas como instrumento axeitado para dar resposta a obxectivos e fins de interese común, en particular, a coordinación e cooperación como elemento relacional básico para a racionalización do mapa universitario e o fortalecemento do conxunto das universidades galegas respectando a identidade de cada unha delas (artigo 2, 1,c da Lei 6/2013, do 13 de xuño, do Sistema universitario de Galicia).

Non obstante a UDC deberá garantir que as actividades derivadas deste convenio axústanse ás normas procedimentais e materias vixentes no momento da concesión da axuda, debendo informar á consellería por medio da comisión de seguimento.

NOVENA.- Publicidade

Segundo a disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, a UDC consente

expresamente para que a Administración inclúa e faga públicos, nos rexistros regulados neste decreto, os datos relevantes referidos ás axudas e subvencións recibidas, así como ás sancións impostas.

A reserva que puideran facer as beneficiarias no sentido de non autorizar a obtención dos datos ou a publicidade destes nos rexistros, que en todo caso terán que expresarse, poderá dar lugar á exclusión do proceso para obter a axuda ou á revogación do acto de outorgamento.

As subvencións estarán sometidas á función interventora e de control financeiro exercida pola Intervención Xeral da Comunidade Autónoma, nos termos que establece a Lei 9/2007, do 13 de xuño, de subvencións de Galicia. Así mesmo, estarán sometidas ás actuacións de comprobación previstas na lexislación do Tribunal de Contas e do Consello de Contas no exercicio das súas funcións de fiscalización e control do destino das subvencións

En aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno, de acordo co indicado na actual redacción do artigo 20 da Lei 38/2003, de 17 de novembro, xeral de subvencións e segundo o disposto nos artigos 3.1, b) e 15 da Lei 1/2016, do 18 de xaneiro, de transparencia e bo goberno, a información correspondente ao presente convenio publicárase na Base de Datos Nacional de Subvencións.

DÉCIMA.- Resolución de controversias

O presente convenio réxese en canto a súa interpretación e desenvolvemento polo ordenamento xurídico administrativo, con expresa submisión das partes á xurisdición contencioso-administrativa, nos termos que se establecen no artigo 47 e seguintes da Lei 40/2015, do 1 de outubro, de réxime xurídico do sector público.

De acordo co establecido no artigo 53 da dita lei este convenio deberá ser remitido ao Consello de Contas nos termos que no mesmo se establecen.

Lido por todas as partes, por si mesmas, e como proba de conformidade co expresado no presente convenio, asínano dixitalmente.

(...)

Consellería de Educación, Universidade e Formación Profesional

(...)

Reitor da Universidade da Coruña